



SHAHIDAN (kanan) semasa proses penamaan calon kerusi Parlimen Arau pada PRU14 lalu.

Report card Shahidan cemerlang di Arau

Oleh **SYED AZLAN SAYID HIZAR**

KANGAR – Rekod cemerlang penyandang kerusi Parlimen Arau, Datuk Seri Shahidan Kasim dilihat sebagai kelebihan utama Barisan Nasional (BN) untuk mengekalkannya di kerusi tersebut pada Pilihan Raya Umum ke-15 (PRU15) ini.

Penganalisis politik Universiti Putra Malaysia (UPM), Dr. Syed Agil Asagoff berkata, 'report card' sepanjang tiga dekad Shahidan dalam dunia politik menunjukkan pencapaian yang mengagumkan.

"Shahidan dilihat cemerlang dan tidak mempunyai isu dalam bidang politik contohnya seperti dialami Menteri Pendidikan, Datuk Seri Radzi Jidin yang mengalami kekalahan di Parlimen Ketereh.

"Daripada sudut kepimpinan pula, bekas Menteri Besar Perlis itu mendapat sokongan kuat daripada akar umbi dan mempunyai pengaruh ke atas lima kawasan Dewan Undangan Negeri (DUN) di bawah Parlimen Arau," katanya ketika dihubungi *Kosmo!* di sini semalam.

Sebagai rekod, Shahidan sudah lebih 30 tahun dalam politik menguasai Parlimen Arau pada PRU 1986,

1990, 2013 dan 2018 selain pernah menjawat jawatan sebagai Menteri Besar Perlis dari 1995 hingga 2008.

Menurut Syed Agil, walaupun calon baharu perlu diketengahkan, namun calon lama juga boleh menang sekiranya diletakkan pada tempat beresuaian.

"Kehadiran muka baharu mungkin memberi nafas baharu kepada pergerakan politik, namun calon lama pula lebih berpengalaman dalam mencorakkan strategi memenangi pilihan raya.

"Bagi memenangi PRU15, parti-parti lain yang ingin merebut kerusi Parlimen Arau daripada Shahidan perlu meletakkan calon yang betul-betul berkaliber bagi menyaingi pencapaian beliau," jelasnya.

Tambah pensyarah kanan komunikasi UPM itu, seandainya nama Shahidan tidak 'lekat' sebagai calon, ia akan memberikan kerugian besar kepada BN amnya dan UMNO khususnya.

Desas-desus mengatakan kemungkinan tinggi berlaku pertembungan tiga penjurur atau lebih selepas beberapa blok politik berminat untuk merampas kerusi Arau daripada BN.